

Gobierno moviendo shelo y tera pa

Valero no 'shut down', pero scohe pa un suspension di operacion

For di luna di december ultimo cu Gobierno a wordo notifica dor di Valero cu nan ta hibando perdidanan grandi pa motibo di e situacion mundial di crudo. Gobierno y sigur Prome Minister Mike Eman a haci esfuersonan sobrehumano pa trata na tene e refineria habri en busca di un solucion duradero.

Pa motibo cu e situacion cu Aruba ta pasando aden cu su refineria no ta algo singular den e tempo aki cu nos ta bibando aden, e solucion no ta tras di porta tampoco.

Gobierno cu e 'menasa' di un posibel ciere di e refineria a corto plazo, no a laga un 'stone unturned' den busca di oportunidadnan pa mantene e refineria habri y na mes momento siguiendo asina un gran cantidad di hende un entrada y pa trata na rescata economia di Aruba.

Durante un conferencia di prensa, Prome Minister Eman y de Meza a splica di e situacion di awe y kico por spera Aruba, ora

otro siman Valero tuma e decision cu sea e ta 'shut down' e refineria of cu nan ta suspendi e operacionnan.

"Algo cu mi colega de Meza y ami a siña den e dos luna y mey aki cu nos ta dedicando intensivamente n'e rescate y solvencia di e refineria ta cu nos urgencia no necesariamente ta urgencia di otro partidonan ni di otro pais of empresa.

Hasta por bisa cu strategicamente por ta ta cumbini otronan pa sinta y mira e desaroyo. E por ta un poco cruel, pero sin duda esey tambe ta hunga un rol.

Empresanan ta keda empresa y nan ta warda riba e momento strategico pa nan sali padilanti y tuma un posicion si nan ta interesa".

Prome Minister Eman a bisa cu bou di e condicionnan negativo cu Valero ta den awor aki por haci dos cos.

"E por bay over na un shut down, esey kier men un decision definitivo cu ta sera e refineria of e

por bay over na un suspension di operacion, caminda ta mantene empleadonan na trabou y ta mantene e refineria den condicion di 'restart'.

Nos a haci un abogacia grandi serca Valero pa scohe p'e di dos opcion, pasobra cu tog nos ta kere cu e partnernan potencial cu tin eyfo ta duna e speranza necesario pa nos por bay den un fase di suspension".

Den cuminsamento di otro siman, Valero ta bay tuma su decision final y anuncia esaki.

"Nos ta kere cu nos a haci un trabou importante den demonstra cu tin partnernan potencial, nos a trece nan na mesa y nos a presenta nan na Valero. Valero di su banda a expresa hopi gratitud pa na di prome lugar p'e condicionnan cu e Gobierno a crea cu por a restart e refineria y na di dos lugar p'e esfuerso, energia y dedicacion cu Gobierno a haci pa trece partnernan bek na mesa cu nan mes ya caba a considera 'afgeschreven', cu interes necesario



y apoyo di e Gobierno".